



Nouva ledscha da chamonnas – seguonda lectüra

In üna seguonda lectüra ha la suprastanza cumünala trattà amo üna vouta il sböz da la ledscha da chamonnas. Causa chi vaiva dat davo la prüma lectüra da la ledscha divers giavüschs per müdamaints ed eir qualche dumondas, s'ha invidà per quista seguonda lectüra eir al giurist Armon Vital. La suprastanza ha decis sur d'ulteriurs pitschens müdamaints vi da la ledscha e tilla sancziunada per rinviar a man da la radunanza cumünala dals 22 mai 2017. Sün giavüschs da la suprastanza, e per cas chi vess da dar amo müdamaints vi da la ledscha, es preschaint quella saira eir il giurist Armon Vital. Davo la radunanza cumünala vain la ledscha da chamonnas suottamissa a la votaziun a l'urna chi ha lö als 30 lügl 2017.

Sanaziun dal suotpassagi da la Viafier Retica in Champatsch a Zernez

Il Cumün da Zernez vaiva tut sü dal 2016 l'idea da nüzziar sinergias e d'improvar a realisar ün proget cumünaivel per il suotpassagi dal binari da la Viafier Retica in Champatsch. Quist suotpassagi es gnü fabrichà avant passa 100 ons ed ha ün profil massa pitschen per passar cun maschinas agriculas e forestalas. Implü es il suotpassagi in ün nosch stadi e sto gnir sanà. Intant es gnü elavurà da la Viafier Retica il preproget ed ils cuosts cumplexsivs, sco eir il scumpart dals cuosts tanter ils intretschats, sun cuntshaints. La dumonda da credit vain preschantada a la radunanza cumünala dals 22 mai 2017.

Sanaziun via Alp Pülschezza

La prüma part da la sanaziun da la via da l'Alp Pülschezza es gnüda fatta dal 2016. La lavur d'impressari per la seguonda part da la sanaziun, chi vain realisada quist on, es gnüda surdatta a la ditta Foffa Conrad SA a Zernez. Implü ha la suprastanza cumünala sancziunà ils contrats per cumprar e barattar il terrain chi s'ha dovrà per realisar la prüma part da la sanaziun.

Spalüdamaint i'ls contuorns da Gonda – Curtins a Lavin

Dürant il 2016 es gnüda realisada la prüma part dal spalüdamaint i'ls contuorns da Gonda – Curtins. Quista lavur d'eira gnüda necessaria causa cha las lingias da drenascha, chi d'eiran gnüdas fabricadas intuorn l'on 1960 dürant la meglioraziun, vaivan ün diameter massa pitschen e d'eiran cun quai suvent stoppadas. Las lingias vegnan rimplazzadas cun büschens cun ün diameter plü grond. La lavur d'impressari, per realisar la seguonda part dal spalüdamaint, es gnüda surdatta a la ditta Foffa Conrad SA a Zernez.

Nouva centrala dal s-chodamaint – surdatta da lavurs

Per la fabrica da la nouva centrala dal s-chodamaint central a distanza in Cul a Zernez ha la suprastanza cumünala surdat las lavurs a las seguaintas dittas: lavurs da sbodada a Bagger Cello GmbH a Zernez; lavurs da terra ad A. + J. Mayolani AG a Zernez; lavurs d'impressari ad Angelini Hoch- und Tiefbau AG a S-chanf; puntinadas a Pamo Gerüste AG a La Punt-Chamues-ch; lavurs da montascha in lain a Foffa Conrad Holzbau AG a Zernez; fanestras da plastic a René Hohenegger Sarl a Brail; lavurs da toler e cuvratets a Foffa Conrad Holzbau AG a Zernez; izolaziun externa raboccada ad Angelini Hoch- und Tiefbau AG a S-chanf; installaziuns electricas a Roner & Partner Scrl a Zernez; installaziuns da s-chodamaint a la ARGE Müller/Di Tommaso a Zernez; büschens dal s-chodamaint central a Brugg Rohrsysteme AG a Kleindöttingen; installaziuns sanitarias a Tung SA a Zernez; manisaziun e regulaziun a la Autevis GmbH a Klosters; lavurs in metal sco eir portas e portals exteriurs a Rauch Metallbau AG a Zernez; lavurs da pittur a Neuhäusler Josin, Malergeschäft a Susch e lavurs da cuvrida da catram a l'Implemia Schweiz AG a Zernez.

La nouva centrala dal s-chodamaint central a distanza dess ir in funcziun d'utuon 2017.

Rimplazzamaint da la staziun da transfuormaziun in Cul – surdatta da lavurs

La staziun da transfuormaziun in Cul sto gnir rimplazzada e vain integrada aint il nouv stabilimaint da la centrala dal s-chodamaint central a distanza. Las lavurs per realisar quista nouva staziun da transfuormaziun sun gnüdas surdattas seguaintamaing: furniziun d'indrizz da mezza tensiun a la Siemens Schweiz AG a Turich; scumpart da la forza da mezza tensiun e prodots prefabricchats a la Repower AG a Bever; furniziun da la staziun da transfuormaziun a Rauscher & Stöcklin AG a Sissach; lavurs d'electricer e montascha da la staziun da transfuormaziun a la EE-Energia Engiadina a Scuol.

Stabilimaint da gestiun in Cul – dret da precumpra

La ditta RH SA, rapreschantada tras René Hohenegger da Brail, ha dumandà a la suprastanza cumünala sch'ella es pronta da renunzchar al dret da precumpra da sia parcella nomer 1180 in Cul a Zernez. Sün quista parcella as rechatta il stabilimaint da gestiun da la RH SA. Il Cumün da Zernez ha ün dret da precumpra sün quista parcella. La suprastanza cumünala ha ponderà, schi fess sen d'insister al dret da precumpra e far adöver da quist stabilimaint, p.ex. per las gestiuns tecnicas e pels pumpiers. Finalmaing s'ha decis da nu vulair s'intermetter illa vendita da quista parcella e da renunzchar al dret da precumpra. Quista decisiun ha da gnir tratta da la radunanza cumünala e vain preschantada a votantas e votants illa radunanza dals 22 mai 2017.

Sarinera nouva a Brail – surdattas da lavurs

La nouva sarinera a Brail es in funcziun daspö principi da quist on. Sco ultimas lavurs sto amo gnir allontanada la sarinera veglia e schlargiada la via d'access. Las lavurs per la demoliziun da la sarinera veglia sun gnüdas surdattas a la Engiadina Recycling AG a Zernez e las lavurs d'impressari per la via d'access a la Angelini Hoch- und Tiefbau AG a S-chanf.

Ruzön III a Zernez – vendita parcella da fabrica

La suprastanza cumünala ha decis da vender l'ultima parcella da fabrica da la prüm'etappa in Ruzön III als unics interessents, nempe a la famiglia Tania e Flurin Lehner da Zernez.

Chamonnas militaras Susch – proseguimaint

Fingìà avant la fusiun dals cumüns vaiva l'antier cumün da Susch tut sü trattativas cun l'Armasuisse a regard il surtour chamonnas militaras sül territori da Susch. La radunanza da preventiv dal cumün da Zernez vaiva acconsenti dal 2016 il credit necessari per la cumpra da las trais chamonnas e da l'ulteriura infrastruttura militar na plü in funcziun, sco buncars e fortezzas. In incumbenza da l'uffizi dal svilup da territori chantunal ha la cumischiun da privel gnü da valütar la sgürezza e classificà duos da las trais chamonnas illa zona da privel 1 (zona cotschna). Per consequenza ha l'uffizi chantunal refüsà pro la preexaminaziun ün müdamaint da l'utilisaziun da quistas duos chamonnas, uschè ch'ellas nu pon in avegnir plü gnir abitadas e nüzziadas sco chamonnas. La suprastanza cumünala es davo lunga discussiun gnüda a la conclusiun chi nu fetscha sen da surtour tuot ils stabilimaints militarics be per avair l'ultim ün'unica chamonna, da la quala pudess gnir fat adöver. Üna cumpra be da singuls stabilimaints militarics nu vain per l'Armasuisse in dumonda. Uscchè s'ha decis da terminar las trattativas cun l'instanza federala.